

Sabtu, 28 March 2020 | 5:26pm



Gardenia tingkatkan kepada 2.2 juta buku roti sehari

Oleh Ilah Hafiz Aziz
illahhafiz.abdulaziz@bh.com.my

KUALA LUMPUR: Gardenia Bakeries (KL) Sdn Bhd meningkatkan pengeluaran roti ke tahap 2.2 juta buku sehari menerusi lima kilang yang beroperasi selama 24 jam.

Pengurus Besar Kanan, Desmond Tan, berkata pengeluaran itu adalah penambahan sebanyak lima peratus daripada jumlah pengeluaran sebelum pelaksanaan Perintah Kawalan Pergerakan (PKP).

“Bekalan ini akan menampung sebanyak 60 peratus permintaan roti dari seluruh Semenanjung dengan jenama lain turut menampung jumlah permintaan yang tinggi.

“Pengeluaran roti pula akan sentiasa mengikut piawaian ditetapkan termasuk aspek kebersihan, penghantaran dan pengurusan roti yang telah tamat tempoh,” katanya.

Beliau berkata demikian ketika menerima lawatan Timbalan Menteri Perdagangan Dalam Negeri Dan Hal Ehwal Pengguna (KPDNHEP), Datuk Rosol Wahid ke kilang di Shah Alam dekat sini, hari ini.

Tan berkata, pengeluaran kasar untuk roti putih adalah sebanyak 840,000 buku sehari.

Katanya, 2.2 juta pengeluaran sehari itu pula adalah kombinasi semua jenis roti termasuk roti putih, roti wholemeal, cream rolls, buns dan twiggies.

Sementara itu, KPDNHEP turut bersetuju agar peruncit melaksanakan pembelian roti terhad secara sendiri mengikut keperluan setempat masing-masing demi menjaga kebaikan pengguna yang lain.

<https://www.bharian.com.my/berita/nasional/2020/03/670404/gardenia-tingkatkan-kepada-22-juta-buku-roti-sehari>

